



主編 郑翔  
副主編 李宇宇 吴国富

# 江西歷代進士全傳

叁

上海古籍出版社

# 黎川县进士传

说明：黎川县，宋、元、明、清时期名新城县，因县内主要河流为黎滩河，县名又别称黎川。汉高祖五年，置南城县，黎川属于南城县之地。和帝永元八年，分南城县西北境置临汝县，三国太平二年，分南城县东南境为南丰、东兴、永城三县，南城县改为新南城，属临川郡，黎川属于新南城县之地。两晋及南朝，新南城俱属临川郡。隋开皇九年，罢临川郡，置抚州，省南丰、永城、东兴复入新南城。大业三年废抚州，复称临川郡，新南城属焉。唐武德五年，临川郡复为抚州，更析新南城置永城、东兴。七年，复省入南城。南唐时，以新南城置建武军。北宋太平兴国三年，改建武军为建昌军。绍兴八年，析新南城东南五乡置新城县，辟黎滩镇为县治，因别称黎川。元至元十四年，改建昌军为路，新城属之。明太祖改建昌路为建昌府，新城属之，清承明制。民国三年，因当时全国有四个新城县，为避免重名，故将新城正式改名为黎川，今属抚州市。黎川县进士共计 190 名，其中宋代 82 人，元代 4 人，明代 22 人，清代 82 人。

## 宋代

### 淳化三年壬辰科(992)孙何榜

#### 危拱辰

**【传记】**危拱辰，江西新城县人，淳化三年壬辰科孙何榜进士。（见《同治新城县志》卷八）

危拱辰，字耀卿，东兴苏源人。性纯孝，父仲勋尝应吏役，拱辰年十四，念其父老，且不到城市，以身代之。题《初月》诗于县斋：“未审初三夜，姮娥怨阿谁？不开十分镜，只画一边眉。”令尹异之，令专儒业。淳化三年，举进士。令尹歿，拱辰行心丧以报。历官十八任，封其父为屯田郎中，迎侍于官，乡里荣之。父卒，赠谏议大夫。拱辰官至光禄卿。（《正德新城县志》卷八；参见《同治新城县志》卷一〇，《同治建昌府志》卷八，凌迪知《万姓统谱》卷四，万锺《宋诗纪事》卷五）

元丰中，光禄卿危拱辰为进士，时遇五台山僧，号称知人，拱辰以前程问之，僧以手帕裹一大钱赠之，曰：“谨守，终有所见。”拱辰秘而俟之。其后登第，死于饶州铸钱监。（宋吴

曾《能改斋漫录》卷一八)

### 咸平三年庚子科(1000)陈尧咨榜

元守文

【传记】元守文，江西新城县人，咸平三年庚子科陈尧咨榜进士。（见《同治新城县志》卷八）

元守文，危仔昌之孙，父德昭仕吴越王，改元姓。以系出新城，故书，亦今制《登科录》书原籍例也。官大理寺丞，出知白州。（《同治新城县志》卷八；参见《正德建昌府志》卷一五，《同治建昌府志》卷七，《光绪江西通志》卷二一）

### 景德二年乙巳科(1005)李迪榜

元奉宗

【传记】元奉宗，江西新城县人，景德二年乙巳科李迪榜进士。（见《同治新城县志》卷八）

公讳奉宗，字知礼，其先临川大姓危氏也。皇考讳仔倡，唐信州刺史，避杨渥之乱，东依钱氏。时朝廷命讨淮南，未行而终，因家于余杭。王考讳德昭，为吴越王相仅三十年，赐姓元氏，累赠太保。考讳秀文，典吴越书命，累赠太仆少卿。妣陈氏，赠冯翊县太君。少卿子五人，曰兴宗、象宗、宜宗、道宗，公即幼子也。三人事忠懿王，有儒术，皆补为郎。象宗，忠懿之婿也，从而还朝，以文召试，拜光禄寺丞。

公精于词律，景德中，天子临轩，试天下士，公中甲科。初命歙州绩溪县事，再命常州武进令，皆以廉爱称。迁漳州从事。故镇牧钱公惟济泊数朝贤交章保任，除忠正军掌书记，俄改淮南幕。本道按刑使采公理行以闻，擢拜太子中允，领淝川榷酤。朝廷以西蜀天下之富，昔者吏吮民膏，怨所由生，阶之为乱，宜清举者往焉，公例改知蜀州晋原县。

今上即位，迁太常丞，赐服五品还。知通州海门县，迁博士。入拜尚书屯田员外郎，有监郡之行。公以思事松楸，愿得余杭一闲局莅之。诏从其请。再期，求分务南都，寻告老，归姑苏郡。朝廷恤之，补一子官。又以籍田之庆，进都官外郎。景祐戊寅岁十月丙戌，考终于永定里第之寝，享年七十有八。

始娶吴氏，再娶李氏，封寿安县君。公三子：昞、煜、暕，皆举进士。昞从其补，今为歙县簿。煜、暕并策名。煜不赴调，暕解官，俱就养左右。及公之丧，勺水不入口者三日。公孝悌之性，不避祸难。初，江浙始下，关讥甚严，衣冠之族，咸促赴阙下，无敢私归。公闻太夫人之忧，昼匿夜驰，以及于葬。兄道宗，有才名，不就世禄，举天府进士，为搢绅先生所推诺。公友事之，如在膝下，易衣并食，不改其乐。有兄子翼，幼依于公，爱之如伤，教之若不及，以至于成，宗党称焉。

相国颍川公曩司浙漕，公在武进，诸郡有难狱，多命公决之。在海门日，患斥卤之泽，民无甘饮。及卜良地，凿大池，广方百步，积泉袤丈。自是虽甚旱暵，人常赖之。又邑有大

读，亘数十里，堙而不治。公抗议，籍力导至于海，人咸利焉。

公退十余年，创竹亭花圃，逍遥其间。多素食清居，非有道者不接。晚年制敛服葬器，而命诸子曰：“吾死之日，必归我于父兄之侧，魂如有知，得事亲于地下。”诸子如其教，以其年十二月甲申，葬于钱塘履孝乡岷陔岭之先茔，礼也。（范仲淹《范文正公集》卷一二《都官员外郎元公墓志铭》；参见《同治新城县志》卷八，《正德建昌府志》卷一五，《同治建昌府志》卷七，《光绪江西通志》卷二一）

### 天禧三年己未科(1019)王整榜

危 祐

【传记】危祐，江西新城人，天禧三年己未科王整榜进士。（见《同治新城县志》卷八）

危祐，字梦弼，拱辰子。天禧三年举进士，出知邵州。使者按治，有所求，祐告以民情，不从，因置笏曰：“某不敢扰民以固位。”请遂归，百姓遮道留之。寻迁太学博士，以言事诋宰相，谪守廉州。吏进聚珠扇，叹曰：“身为廉州太守，而此扇以对吏民，独不愧州名乎？”遂却之。子固，以善诗名。曾孙定国，绍兴戊辰进士。（《正德新城县志》卷八；参见《正德建昌府志》卷一五，《崇祯廉州府志》卷九，《同治建昌府志》卷七、卷八，《同治新城县志》卷八、卷一〇，《光绪江西通志》卷一五五，凌迪知《万姓统谱》卷四）

### 天圣八年庚午科(1030)王拱辰榜

元 绛

【传记】元绛，江西新城县人，天圣八年庚午科王拱辰榜进士。（见《同治新城县志》卷八）

元绛，字厚之，德昭孙。登宋天圣庚午王拱辰榜进士，授江宁推官，摄上元令。民有豪占人田者，捕置于法。甲与乙被酒相殴，甲归卧，夜为盗断足，妻告乙，执乙至，而甲已死。绛敕妻曰：“归葬而夫。”阴使人迹其后，望一僧迎笑私语。绛取僧系之，诘妻得奸状。擢知台州。州大水冒城，民庐荡析。绛出库钱，作屋数千区，命人自占，期三岁偿费，流移者皆复业。又甃其城，因门为闸，以御湍涨，后人守其法。知静海时，江淮制置使建言私贩盐满二十斤者皆坐徒，绛曰：“海滨之民恃盐以生。”非群贩者，止笞而遣之。擢江西转运使。依智高反岭南，而宿军邕州。绛供军饷有功，累迁翰林学士。工于文辞，一时名人皆推许之。拜参知政事，后以太子少保致仕，谥章简。有文集数十卷。（《正德新城县志》卷八；参见《正德新城县志》卷七，《正德建昌府志》卷一五，《同治建昌府志》卷七，《光绪江西通志》卷二一）

国朝登用辅臣，尽循唐旧。乾德二年，太宗皇帝始置参知政事以贰宰职。六圣继承，遵守不改。自乾德迄熙宁百余年间，得人之盛，见于国策者七十有六人。或以文学进，或以武功显，或自右枢而叙升，或由夙望而入用，或以台阁久勤而次迁，或以藩州治效而超拜，卿材国器相望于庙堂，从而正宰衡、执邦柄者，常什七八焉。若乃耆德宿名，体备数器，

政事为良吏表，儒学为群彦先，出入藩朝，既劳且旧，有如故太子少保致仕、赠太子少师魏郡元章简公者几希矣。公讳绛，字厚之，杭州钱塘人。其先本危氏。案崔琳《姓苑》：“危，姬姓也。”后封于新，世久寢微。秦汉以来，虽有仕者，未甚显大。其一支著临川郡之南城县，世力农，以财雄乡里。唐季江淮寇盗充斥，公之曾祖讳仔倡与其兄全讽鸠合乡人，即所居立壁垒，远近依以为援。中和五年，破黄巢之党柳彦章于象牙潭，天子以全讽为抚州刺史，仔倡信州刺史。吴王杨渥克定江西，抚州降吴，徙江都，信州奔钱塘，遂易元氏。生公祖，讳德昭。武肃王称制，用以为相，官至右仆射兼侍中、晋国公。晋公九子，其八荫补王官。幼子讳守文，入朝中咸平进士第，官终大理寺丞、知白州，公之考也。

公幼孤，流寓江湖，卓然自立，向学不怠。九岁谒荆州太守孙公冕，面试三题，以神童荐于朝，贫不克行。十八，拔开封进士，荐廷试优等，以声病降同学究出仕。迫于亲养，不遑择禄，调楚州淮阴县主簿。岁恶，蝗蝗害稼，民户诉灾，转运使按状，以为无损。公亲履田亩，核实蠲租，上不能夺。是岁，楚之四邑，独淮阴民免转徙之患。乡贡再上，擢乙科，授江陵府观察推官。明道旱灾，江淮荐饥，官发廩米为糜淖以哺流民。公职其事，躬自给视，饥病者数万皆得以济。大尹李康靖公、安抚范文正公上其事，召见，改秘书省著作佐郎。连知吉州永新、通州静海二县，或以治剧选，或以干裕荐，并书课闻于朝。擢江西转运判官，职罢，愿试繁郡。会天台水溢城郭，漂溺千余家，被命知台州。至则出公库钱，即民故居作庐舍，令自占，期三岁偿所逋。又甃其城，闸其门，以捍江涛之患。自是，水不败城郭。代还，权三司度司判官。属甘陵兵旱之后，道殣相望，庾无见储，责在度支。公为之校耗登，调盈虚，转它州赢粟给助其乏。逾年，出为江西转运使，奏除一道民籍丁钱，贫老者蒙利尤多。皇祐三年，广源侂蛮寇二广，守漕皆坐失律免官。朝廷旰食，为择使者，就加公直集贤院，充广东转运使。始逾岭，径趋贼冲，躬相隘险，濒江建水砦数十，缮治诸州城，楼堞戎器，纤悉如法。上闻，特迁一官。历两浙河北转运二司、盐铁副使，擢天章阁待制、知福州。治平初，拜右谏议大夫，以给事中知应天府、兼南京留守。徙河北都转运使，过都陛对，奏陈中外利病。英宗皇帝面称之曰：“论事者无如待制忠，朕弗忘也。”神宗即位，进尚书工部侍郎，以待制换集贤院学士。是岁迁龙图阁直学士、知广州。时南方岁凶盗炽，州郡多故，凡五岁中连徙越、荆、郢三州，皆兼一路使职。未至郢，召入翰林为学士。公早以文学擅，而久更吏剧，负其夙志。虽簿书填委，而未尝辍简编，舍翰墨。晚遇知己之主，翱翔禁复，得以摅发其蕴。故制书诏令纯深温润，切于事理。至于一篇一咏，往往出人意表，秉笔之士，以此多称美之。加又抒思精深，长于应猝。初景灵宫诸殿落成，须上梁文，诏以属公。薄暮受命，黎明奏篇上，上深赏激，都下竞传诵之。明年，知开封府，满一岁罢。兼侍读学士。未几，权三司使，坐属官遗火焚省舍，落所兼学士。无几何，复职，领群牧使。

熙宁八年冬，拜参知政事。公自预政，每进对上前，敷奏详悉，曲尽诚款。诸公论议或同异，公无所委随，惟正之助。而谨畏慎密，虽对子弟，未尝及省中语也。上雅称公文词高妙，近世少儗，足为朝廷光采。虽在中书，犹欲以辞令诿之。每蕃夷书诏，必令视草而后遣。越三岁，告老于上曰：“臣年政七十矣，愿乞残骸归故里。”前后表请面陈，至逾十数。

上敦谕再三，又遣中人持还其章。他日谓曰：“闻卿子耆宁孝谨好学，今使之校书崇文，以留卿二期。”公惶恐固辞，不获。既而谓亲友曰：“上恩如是，非孤臣之福，自兹吾不知税驾之所矣。”

元丰二年春，太学起虞蕃诏狱，扳公尝以族人伯虎语博士孙谔，风祭酒补小学教谕，辞逮耆宁名，捕甚遽。公骇不知所谓，入诉于上曰：“耆宁幼失所恃，未尝跬步去臣左右，父子更相为命二十余年矣。仓卒对狱，实虞非意，愿纳臣平生禄职以赎其命，使即讯于家。事之是非轻重，一切听报。”上恻然许之。御史犹胁迫伏辜，又诣府第，以簿急责公。公不复视，遽取笔答具狱曰：“御史所讯，皆是。”遂以本官出知亳州。初，狱成，或谓公曰：“伯虎补职且半年，耆宁未捕前数日方知以白公，是岂有祷也？谔又未尝造请，安得私语事？此一言可以自辨。”公曰：“吾大臣也，既以告上矣，今若自明，是前言不尽也。岂有大臣对上言而二三者？内省无愧，复何辩为？”卒无一言及之。至陛辞，上察无它，赐坐，慰劳曰：“毫若非便，易陈、许可乎？”公谢曰：“既蒙保全不诛，又使择地，其敢自便！若圣恩不遗，得支郡如颍足矣。”即命改知颍州，曰：“一岁即召卿。”仍使服金艾如学士，以宠异之。明年，加资政殿学士、知青州。诏许入觐，遂留提举中太一宫。公志欲休老，章又十余上，告病者数四。一日，上临讲迓英，特召公面谕曰：“卿志力未衰，尚可备左右，勉为朕留进读。”对曰：“西夕余景无几，不幸颠仆而去，或溘死不得归骨先陇，即目不瞑矣。”上深喜其诚。至四年，以太子少保致仕。既辞，上曰：“卿预政中立不倚，比有间言者，朕自知之。今既罢去无嫌，可营居京师，且便耆宁仕宦，朕当助卿费。”公曰：“臣有吴中敝庐，倘可售，即如诏旨。”特命二子分领鸿庆、洞霄二宫，俾居家就养。行次畿县，又遣中使赐白金千两，戒以早为还都之行。其恩意终始隆厚如此。既至吴，脱略世故，不问家之有无，优游宴乐，吟咏情性，超然若出风尘之外。后三年，薨于家寝。讣闻，辍垂拱朝一日，赠太子少师。初，上览遗奏，谓左右曰：“此表必元某自为者。”即日驰内侍问诸孤，法贖外特赐百金，戒其家集平生所为文章来上，凡四十卷，藏于秘阁。

公生大中祥符己酉，终元丰甲子。以天圣丁卯登仕，以元丰辛酉纳禄，起州县，历中外华要而至丞弼。自著作佐郎，十三迁至尚书工部侍郎。官制行，换正义大夫，五易封爵，至魏郡公。凡九镇藩郡，而兼一路安抚钤辖者四；六经使任，而江西、河北皆再至。入朝典领台阁诸宫观，更践省府总十一职。所至皆有治效，而闽、广、京兆善绩尤著，至今人犹称道之。以二品致政，耆老富贵，康宁考终，寿七十六。在仕五十八年，修洁寡过，保躬全名，善始令终，世鲜其比。

公生始孩稚，颖拔不类常儿。乳保尝负之过佛室，见所谓观音像者，辄喜笑若素所熟。又指黄卷中《普门品经》，欲持取去家中，止之则啼号不已，闻者嗟异，以谓宿习之说不妄也。性至孝，自幼服勤亲侧，不懈晨夕。太夫人尝寝疾，寝亟，公忧悸不知所为，默祷于天，愿以己代亲所苦，恍然若神示其象，已而遂愈。洎太夫人弃养，服丧毁瘠，葬祭不逾礼制。昆弟六人及子孙未有官者，皆用公荫补入仕。又市良田以贖族人之无禄者，自少长拊存周至，卒无异言。其孝友敦笃行义如此。

公少历艰苦，周知物情，儒术吏资，盖得之天赋，非勉强所能及。接物极和易，与人言洞然见底里，至临事则严毅立断，下不能以毫毛欺给。在江宁摄治府下二邑，戢狡吏，抚疲民，治誉蔼然。钟山有民妻诉夫夜醉归，道为仇人折足，至家而死。公默察妻泣不悲，遽使归听命。既去，阴遣吏蹑迹，见与一浮屠笑语，立捕系，一讯而得奸状。实浮屠私其妻，期是夕会于家。既至，夫寢觉而遽起，为所戕。卒置于法。横山王氏子恃富不法，常贼杀不辜，里民目为“王豹子”，莫敢与校。一日因事追下狱，公数其宿负，榜杀之，邻里亲戚莫不称快。永新土豪龙聿者，尝诱同里少年周整饮博，以奸胜整千缗，准其上腴田以偿直。初犹代耕输谷，岁久遂割占其田。整母方知博事，讼于县，则母契存焉。于州、于使者挝登闻鼓，皆不能直。公至，母又以告，公视契，一言以辨其伪。聿具伏，归整田。或问公以何见其伪，曰：“始视契，日月在母氏印上，是必得母他牍尾印以续伪契。”问之，果然。一县惊叹，以为神明。其典州使部，不为赫赫名，察见吏民隐慝，纤悉不差。然意本在宽，情既得则纵舍，不穷其细故，未尝以文致人罪。有《漱狱集》十三卷，总五十五事。观其书，可以知公之所存皆得于平易忠恕也。

公病世俗靡薄，朋友道丧，尝后己以从众。故与人交久而益亲，人皆称公长者。还吴，日与乡间耆旧相过从，遨游江湖，处布衣野老间，无辨也。内外扫之日，初无苦疾，无治命，嗒焉顺化，人以为吉履之报焉。

公之薨也，门人某官某状公之行以告于太常，考功集议，谥曰章简。其葬也，今资政殿学士龙舒王公铭公之德，纳诸阴堂。举是二者，可以传不朽矣。而嗣子犹以为未也，曰：“状藏于官府，铭置于泉涂，见者盖寡。礼令有碑揭于神道，可以耸来世之观听也。”谓予早与公周旋，尤详行实，假文以劓于石。言念畴昔，音旨如昨，追而叙之，一二可记。公之在翰林也，予方在朝廷，每训辞之下，及应用手笔、碑表、诗歌，多得览观，其体制深重，章句清裁，传在人口，皆出新意，由是知公之文无所不长也。又尝与公持论前言往行，讲寻源流，或推究天人善败之应，互叩其所蓄，往往更相推许，由是知公之学无所不综也。昔公使南海，当寇钞之余，经画尤多。时予邕州从父守英州御寇，亦与有劳。尝云：“方寇之去也，东广生聚无不被其毒者，非惟獠贼之遗孽，抑吏卒乘乱剽掠甚于贼锋，无能摧却者。”洎公之来也，戢兵保民，咸有条画。饥冻者得其衣食，流冗者复其居处，与夫驱除俘馘之劳，殆不侔也。由是知公之息民弭患之功远矣。公之得谢也，予方谪麾横海，相遇都下，留连眷眷，几不忍别。遂媾姻好，至诚悃悃，不以先后改观。此又知公笃于旧故，虽古人之所谓“久要不忘”者，何以过此！故予尝怀之，未始忘也。因孝嗣勤请，得以详其实告于后人，亦公之雅志也。（宋苏颂《苏魏公文集》卷五二《太子少保元章简公神道碑》；参见王安礼《王魏公集》卷八《资政殿学士太子少保致仕赠太子少师谥章简元公墓志铭》，《宋史》卷三四三）

## 景祐元年甲戌科(1034)张唐卿榜

元 暎

【传记】元暎，奉宗子，江西新城县人，景祐元年甲戌科张唐卿榜进士。官尚书屯田郎



中,出知建州。(见《同治新城县志》卷八;参见《正德建昌府志》卷一五,《嘉靖江西通志》卷一七,《嘉靖建宁府志》卷五)

### 宝元元年戊寅科(1038)吕溱榜

过 昱

【传记】过昱,江西新城县人,宝元元年戊寅科吕溱榜进士。(见《同治新城县志》卷八)

过昱,字彦明,南城人。宝元进士。性至孝,母没,刻木为像事之。父一日大恸,昱惊问故,徐曰:“无他,念吾事尔祖,自谓已尽礼,今日见儿事吾,始觉犹未尽,故感悔而悲耳。”及父没,水浆不入口者七日,孺慕终身。(《光绪江西通志》卷一五五;参见《正德建昌府志》卷一五、卷一六,《嘉靖丰乘》卷二,《同治建昌府志》卷七、卷八,《同治南昌府志》卷二九,《光绪江西通志》卷二一)

### 庆历二年壬午科(1042)杨真榜

何 潜

【传记】何潜,字升之,谥清敏,江西新城县东兴乡人,庆历二年壬午科杨真榜进士。通判汉阳军,迁兵部职方郎中,升工部侍郎。(见《同治新城县志》卷八;参见《正德新城县志》卷七,《同治建昌府志》卷七,《光绪江西通志》卷二一)

何 渊

【传记】何渊,字深之,谥清节,江西新城县人,庆历二年壬午科杨真榜进士。官至兵部侍郎。(见《同治新城县志》卷八)

何 滨

【传记】何滨,字行之,谥忠清,江西新城县人,庆历二年壬午科杨真榜进士。官至户部侍郎。(见《同治新城县志》卷八)

### 庆历六年丙戌科(1046)贾黯榜

刘扶庆

【传记】刘扶庆,字彦辅,江西新城县北坊人,庆历六年丙戌科贾黯榜进士。官大理寺丞。(见《同治新城县志》卷八;参见《正德新城县志》卷七,《正德建昌府志》卷一五,《同治建昌府志》卷七,《光绪江西通志》卷二一。按:县志作“刘扶”,省志作“刘扶庆”)

傅 容

【传记】傅容,江西新城县沙溪人,庆历六年丙戌科贾黯榜进士。(见《同治新城县志》卷八;参见《正德新城县志》卷七,《正德建昌府志》卷一五,《同治建昌府志》卷七,《光绪江西通志》卷二一)

余妻之母危,危母傅氏,两家皆业儒术,子侄以俊秀游友其乡,是故世有姻好。维南城

之危起家始拱辰，实淳化三年进士，终屯田员外郎，赠光禄卿。傅氏始容，庆历六年丙科，以鄱阳尉谢病归，遂不出。然两家之仕者，自是不绝。夫人容之娣，而拱辰之第三男妇也，年二十而归，归三十六年而嫠，嫠二十六年而卒。维光禄为人崛杰高亢，其配长安县君丁亦以肃飭为闺门常。而夫人在娣姒间，见谓无违，不激不委，唯正之师，唯是之从。其及既嫠，则壹素以严，刻刻勤辛，恶衣菲食以致给足，治丝枲纫缝。诸儿能诵书，使坐前，旁持久与俱，不夜分不言寐，子幼则子，孙幼则孙，无日不然。闻人为善，喜见于颜，语如其色。宾客过家，供具饌饮频数不厌。嫁子娶妇，问其世于礼义何如，而不及贫富也。（吕南公《灌园集》卷二〇《傅夫人墓志铭》）

### 傅天翼

**【传记】**傅天翼，江西新城县沙溪人，庆历六年丙戌科贾黯榜进士。官前行汾州团练判官，升著作佐郎。（见《正德新城县志》卷七；参见赵湘《南阳集》卷一七《前行汾州团练判官傅天翼可著作佐郎》，《正德建昌府志》卷一五，《同治新城县志》卷八，《同治建昌府志》卷七，《光绪江西通志》卷二一）

## 皇祐元年己丑科(1049)冯京榜

### 邓润甫

**【传记】**邓润甫，江西新城县人，皇祐元年己丑科冯京榜进士。（见《同治新城县志》卷八）

邓润甫，字温伯，后避高鲁王讳，更名温伯，字圣求，北坊人。少从李太伯学。登皇祐元年进士，调信州上饶尉，主开封府酸枣簿，移鄂州武昌令，知夔州奉节县，改著作郎。召试贤良方正，不应。熙宁中，王安石当国，中书置检正官，以温伯为编修中书条制、检正中书尚书户房事。诏取所进文，上览而嘉之。迁集贤校理、直舍人院，寻知审官东院，兼知谏院，察访京东路。还知制造，权御史中丞，直学士院。继迁翰林院学士，兼侍读。制辞典润，时誉归之。因论奏相州狱事审讯，温伯不实，落四职，以右谏议大夫知抚州，移知杭州。寻以龙图阁直学士知成都府，继复职如初，兼掌皇子阁笈记。元丰末建储，覃霈道扬，遗命崇奉三宫及内外相暨亲王进恩，一夕锁麻二十二道，撰神宗皇帝谥议，凡大手笔，倚温伯一人以办。除承旨，充《神宗皇帝实录》修撰官。其命词云：“温伯学识深粹，辞致华敏。逮朕初潜，实管记牒。俄畴攀附之旧，首被年德之选。”其见推重如此。集贤殿修撰林希赠温伯贺启亦云：“先帝北门之词客，二纪于兹；主上东宫之旧臣，一人而已。”时论服其切当。盖温伯自宠遇至此，三入玉堂矣。未几，丁内艰，服除为吏部尚书。元祐用事之臣结党排陷，坐制蔡确麻词不当，以龙图阁直学士黜知亳州。阅岁，复以学士、承旨召。居数月，恳请郡，除端明殿学士、礼部尚书。又请不已，乃除知蔡州，移知永兴军。以兵部尚书召。绍兴改元，上躬擐权纲，温伯首陈“武王能广文王之声，卒其功业；成王嗣述文、武之道，以养其心”，上嘉纳焉。是年二月，知贡举。自贡院拜尚书左丞，中人宣诏，宠赉甚渥。温伯拜命扬鞭，揖两庑士人，上马趋朝，时人荣之。夏五月，薨于位，年六十。赠开府仪同三司，后累

赠太师，谥曰安惠。弟：考甫，登嘉祐丁酉进士；佑甫，治平乙巳进士，官中奉大夫、直秘阁。（《正德新城县志》卷八；参见《正德建昌府志》卷一五，《同治新城县志》卷一〇，《同治建昌府志》卷七、卷八，《光绪江西通志》卷二一）

邓润甫，字温伯，建昌人。尝避高鲁王讳，以字为名，别字圣求，后皆复之。第进士，为上饶尉、武昌令。举贤良方正，召试不应。熙宁中，王安石以润甫为编修中书条例、检正中书户房事。神宗览其文，除集贤校理、直舍人院，改知谏院、知制诰。同邓綰、张琥治郑侠狱，深致其文，入冯京、王安国、丁諷、王尧臣罪。

擢御史中丞。上疏曰：“向者陛下登用隗贤，更易百度，士狙于见闻，蔽于俗学，竞起而萃非之，故陛下排斥异论，以图治功。然言责之路，反为壅抑；非徒抑之，又或疑之。论恤民力，则疑其违道干誉；论补法度，则疑其同乎流俗；论斥人物，则疑其讦以为直。故敢言之气日以折，而天下事变，有不得尽闻。曩变法之初，势自当尔。今法度已就绪，宜有以来天下论议。至于淫辞诡行，有挟而发，自当屏弃。如此，则善言不伏，而真大治也。”

李宪措置熙河边事，润甫率其属周尹、蔡承禧、彭汝砺上书切谏，其略云：“自唐开元以来，用杨思勳、鱼朝恩、程元振、吐突承璀为将，有功则负势骄恣，陵轹公卿，无功则挫损国威，为四国笑。今陛下使宪将兵，功之成否，非臣等所能预料。然以往事监之，其有害必矣。陛下仁圣神武，驾御豪杰，虽宪百辈，顾何能为，独不长念却虑，为万世之计乎？岂可使国史所书，以中人将兵，自陛下始？后世沿袭故迹，视以为常，进用其徒握兵柄，则天下之患，将有不可胜言者矣！”不听。

又言：“兴利之臣，议前代帝王陵寝，许民请射耕垦，而司农可之。唐之诸陵，因此悉见芟刈，昭陵乔木，翦伐无遗。熙宁著令，本禁樵采，遇郊祀则敕吏致祭，德意可谓远矣。小人掎克，不顾大体。愿细创议之人，而一切如令。”从之。

迁翰林学士。因论奏相州狱，为蔡确所陷，落职知抚州。移杭州，以龙图阁直学士知成都府。召复翰林学士，兼掌皇子阁笺记，一时制作，独倚润甫焉。哲宗立，惟润甫在院，一夕草制二十有二。进承旨，修撰《神宗实录》。以母丧去，终制，为吏部尚书。梁焘论其草蔡确制，妄称有定策功，乃以龙图阁学士知亳州。阅岁，复以承旨召。数月，除端明殿学士、礼部尚书。请郡，得知蔡州，移永兴军。

元祐末，以兵部尚书召。绍圣初，哲宗亲政，润甫首陈武王能广文王之声，成王能嗣文、武之道，以开绍述。遂拜尚书左丞。章惇议重谪吕大防、刘摯，润甫不以为然，曰：“俟见上，当力争。”无何，暴卒，年六十八。辍视朝二日。以尝掌均邸笺奏，优赠开府仪同三司，谥曰安惠。（《宋史》卷三四三）

## 嘉祐二年丁酉科(1057)章衡榜

王无咎

【传记】王无咎，江西新城县人，嘉祐二年丁酉科章衡榜进士。（见《同治新城县志》卷八）

王无咎，字补之，瑜子。登嘉祐进士，授将仕郎，试秘书省校书郎，守扬州江都尉。始起于穷约，未有知者。曾巩一见异之，妻以女弟。丁父忧，服阕，调仪真主簿，迁天台令。弃官从王安石学，久之，无以衣食其妻子，复调南康主簿，已又弃去。与庐陵欧阳修、长乐王回游，而从安石最久。好书力学，寒暑行役不暂释，所在学者师之，去来常数百人。至京师，士大夫有卜邻以考经质疑者。曾肇称其于书无所不读，读无不记，于圣人微言奥旨精思力索，必极其至，于诸子百家、历代史记、是非得失之理，必详稽而谨择之，故其为文贯彻古今，反复辨博，而卒归于典要。安石荐其文行赅备，守道安贫，而久弃不用，诏以为国子直讲，命未下，卒，年四十六。所著有《论语解》及文集行于世。子，长纲、次缙，皆举进士。（《同治新城县志》卷一〇；参见《正德新城县志》卷八，《正德建昌府志》卷一五，《同治建昌府志》卷七、卷八，《光绪江西通志》卷二一）

君南城人，王氏，讳无咎，字补之，嘉祐二年进士也。初补江都县尉，丁父忧，服除调卫真县主簿。尝弃天台县令，以与予共学。久之，无以衣食其妻子，乃去，补南康县主簿。会予召至京师，因留教授。上方兴学校，以经术造士。予言君可教，国子命且下，而君死。君所在，学者归焉，贤士大夫皆慕与之游。然君寡合，常闭门治书，唯与予言莫逆。当熙宁初，所谓质直好义，不为利疚于回而学不厌者，予独知君而已。君之死，年四十有六，实熙宁二年闰十一月丁巳。至四年二月壬申，妻曾氏、子纲、缙始克葬君南城县礼教乡长义里。（王安石《临川集》卷九一《王补之墓志铭》）

### 邓考甫

【传记】邓考甫，江西新城县人，嘉祐二年丁酉科章衡榜进士。（见《正德新城县志》卷七）

邓考甫，字成之，润甫弟。嘉祐二年第进士，历陈留尉、万载永明令、知上饶县，积官奉议郎，提点开封府界河渠。坐事去官，遂闭户著书，不复言仕。元符末，诏求直言，考甫年八十一，上书云：“乱天下者，新法也，末流之祸，将不可胜言。今宜以时更化，纯法祖宗。”因论熙宁而下，权臣迭起，欺世误国，历指其事而枚数其人。蔡京嫉之，谓为诋讪宗庙，削籍羁筠州。崇宁去党碑，释逐臣，同类者五十三人，其五十人得归，惟考甫与范柔中、封觉民独否，遂卒于筠。所论述有《卜世大宝龟》、《伊周素蕴》、《义命杂著》、《太平策要》等，凡二百五十余篇。（《同治新城县志》卷一〇；参见《正德建昌府志》卷一五，《同治建昌府志》卷七、卷八，《光绪江西通志》卷二一）

邓考甫，字成之，临川人。第进士，历陈留尉、万载永明令、知上饶县，积官奉议郎，提点开封府界河渠。坐事去官，遂闭户著书，不复言仕。元符末，诏求直言，考甫年八十一，上书云：“乱天下者，新法也，末流之祸，将不可胜言。今宜以时更化，纯法祖宗。”因论熙宁而下，权臣迭起，欺世误国，历指其事而枚数其人。蔡京嫉之，谓为诋讪宗庙，削籍羁筠州。崇宁去党碑，释逐臣，同类者五十三人，其五十人得归，惟考甫与范柔中、封觉民独否，遂卒于筠。且死，命幼孙名世执笔，口占百余言，其略曰：“予自谓山中宰相，虚有其才也；自谓文昌先生，虚有其词也。不得大用于盛世，亦无憾焉，盖有天命尔。”所论述有《卜世大宝

龟》、《伊周素蕴》、《义命杂著》、《太平策要》等，凡二百五十余篇。（《宋史》卷四五八）

## 治平二年乙巳科(1065)彭汝砺榜

邓祐甫

【传记】邓祐甫，润甫弟，江西新城县人，治平二年乙巳科彭汝砺榜进士。官至中奉大夫、直秘阁。（见《同治新城县志》卷八；参见王梓材《宋元学案补遗》卷三，《正德建昌府志》卷一五，《正德新城县志》卷七，《同治建昌府志》卷七，《光绪江西通志》卷二一）

## 熙宁三年庚戌科(1070)叶祖洽榜

傅 权

【传记】傅权，江西新城县沙溪人，熙宁三年庚戌科叶祖洽榜进士。（见《同治新城县志》卷八；参见《正德新城县志》卷七）

傅权，字次道。自幼力学，结屋东岩山岭，诵读其中。举熙宁进士，授建宁军观察推官。曾巩尝称其诗文义高辞美，可谓特出。所著有《东岩集》，学者称东岩先生。同时有傅翼者，字翼之，熙宁中特奏召除永丰令，为李觏门人，亦好学能文，所著有《甘圃集》。论曰：“盱江自李泰伯、曾子固倡道斯文，学者彬彬，咸以经术文章自奋。虽所诣不无浅深，而论议一归鸿雅。傅野所著不复见，向与权为子固所许。然检子固与二子书，一则勉其强于自立，使可爱者非特文词，一则勉其自强不已，则道德之归，其孰可御？”先辈切磋之盛盖若此。（《同治新城县志》卷一〇；参见《正德建昌府志》卷一五、卷一六，《同治建昌府志》卷七、卷八，《光绪江西通志》卷二一）

故处士傅君，家于东岩山之阴，实南城沙溪之上村，传术聚书教子弟，为邑里讲学倡始，才名学子相望，得科第惟傅氏人众。处士少而承训，既冠，有俊誉。而父病失一目明，因自惟念无兄弟，奉养叵阙，即弃进学业，而专治耕稼以致其旨甘，如是者二十年，父无后忧，足不出户庭。族人有谋并其同产土地者，虑不见酢，故羸处士父名而讼于官。县摄符下，处士察父有难色，乃驰诣县，请以身代病父，县怜而许之。已而谋并地者辞穷，犹诬污不肯置，于是处士泣曰：“大夫言彼讼者志得人地耳，诚令病父免吏议，则愿推吾产界之，虽行乞养亲所不憾也。”讼者大惭，无以遂其奸。众皆叹息其为人子概如此。至自有子，则亦尽义教之。其言曰：“学优而仕，非成人已乎？文辞而已，非所谓学也；苟禄而已，非所谓仕也；必也德充乎己，业利乎人，然后可语优焉。”其为人父概如此。喜奕棋，工为近体诗。居乡以和易为主，而不诱于非义，其心盖不徒合众而止也。治平二年，梦游山观，至石室间，有羽衣人延之坐，俄探案上青囊，得白字碧筒示之，其文曰：“四十五日而病，五日而卒。”寤而异焉。明日，召其子于学山，至则伤以家事，且促凶备。当是时，处士称孤久矣。母夫人在堂，闻其语而悲之。而碧筒之文果验，十一月丁卯竟卒，寿四十二。将终，涕泗，谢母以不能终养为忧，且曰：“夫人所倚者，孙耳。”语已，端坐而瞑。明年，卜葬于屋东之河源，卜吉，遂以二月丙午窆之。处士娶邓氏女，生二子，其长曰权，教之仕学者也，其次早夭矣。

后处士之葬五年，权及第，调漳州浦县尉，秩满移建州观察推官。待次来归，展墓内外，宗姻邻曲父老皆会于松柏下，杂然诵处士之德。其幼壮者咨于长老，以后生弗及闻知为歉，曰：“盍表以文，刻石示来者乎？”众皆曰然。于是以命吕南公曰：“唯子宜为之文。”某曰：“是文也，当何爱于论撰？虽然以处士善庆而有子如此，腾蹶翔转，高远坐致，则追荣不晚，而后书之，岂不可哉？亦曰贤在德，不在官焉耳。夫宗姻邻曲之志，固亦得之此乎？”处士讳某，字世长。其曾祖讳某，父讳某。熙宁八年秋七月取文后，三月刻之，墓遂有表。（吕南公《灌园集》卷一九《傅处士墓表》）

### 熙宁六年癸丑科(1073)余忠榜

#### 傅翼

【传记】傅翼，字翼之，江西新城县人，熙宁六年癸丑科余忠榜进士。熙宁中，特奏召除永丰令。为李觏门人，亦好学能文，所著有《甘圃集》。（见《同治新城县志》卷八、卷一〇；参见李觏《盱江集》附录《直讲李先生门人录》，陆心源《宋诗纪事小传补正》卷二，《同治建昌府志》卷七，《光绪江西通志》卷二一）

#### 傅汝舟

【传记】傅汝舟，字晓窗，江西新城县人，熙宁六年癸丑科余忠榜进士。博学工诗，欲绍先祖令名，乃立义试诗会，聘邓秀实师之，日与四方名士更相倡和，一时作者云集。（见《同治新城县志》卷八；参见《同治建昌府志》卷八，《同治建昌府志》卷七，《光绪江西通志》卷二一）

#### 周申

【传记】周申，江西新城县人，熙宁六年癸丑科余忠榜进士。（见陆心源《宋诗纪事补遗》卷二一；参见《同治新城县志》卷八，《同治建昌府志》卷七，《光绪江西通志》卷二二）

### 熙宁九年丙辰科(1076)徐铎榜

#### 刘孝立

【传记】刘孝立，江西新城县北坊人，熙宁九年丙辰科徐铎榜进士。官滁州司户参军。（见《同治新城县志》卷八；参见《同治建昌府志》卷七，《光绪江西通志》卷二一）

#### 傅辅德

【传记】傅辅德，江西新城县人，熙宁九年丙辰科徐铎榜进士。（见《同治新城县志》卷八；参见《同治建昌府志》卷七，《光绪江西通志》卷四九）

### 元丰八年乙丑科(1085)焦蹈榜

#### 陈孔明

【传记】陈孔明，江西新城县东坊人，元丰八年乙丑科焦蹈榜进士。官朝请郎、知陈州。（见《同治新城县志》卷八；参见《正德新城县志》卷七，《正德建昌府志》卷一五，《同治

建昌府志》卷七，《光绪江西通志》卷二一)

### 绍圣元年甲戌科(1094)毕渐榜

王 纲

【传记】王纲，无咎子，江西新城县人，绍圣元年甲戌科毕渐榜进士。官儒林郎。（见《同治新城县志》卷八；参见《正德新城县志》卷七，《正德建昌府志》卷一五，《同治建昌府志》卷七，《光绪江西通志》卷二一）

刘 昌

【传记】刘昌，旧志名丹，《登科记》作刘昌，江西新城县北坊人，绍圣元年甲戌科毕渐榜进士。（见《正德新城县志》卷七；参见《同治新城县志》卷八，《正德建昌府志》卷一五，《同治建昌府志》卷七，《光绪江西通志》卷二一）

新城士人刘溥，将应绍兴庚午秋举，其父与邻人陈七翁相好，来言：“吾昨梦看本军解榜，其间有刘彦宏姓名，贤子似可用此名就试，悦契吾梦。”父呼溥告之，乃以彦宏应诏，而字曰先觉，果预荐送，然蹉跎至淳熙戊戌，始特奏补大学。初调大和尉，到任二年半，终于官。没后托梦于妻曰：“我生前合有三年禄食在大和，适以数尽，才得六个月而死，故今世补之，宿缘已足，是故归耳。汝辈勿用悲忆也。”好事者以邑志爵里名籍考之，绍圣元年甲戌，本境石坡人刘丹字彦宏，登进士第，任大和尉，仅得六月下世，而后来者乡里姓氏悉同，且以前人字为名，筮仕之处又同，其末后之梦，彰著如此，则为后身不疑。噫！两刘彦宏，一登第，一特恩，共享三年微俸，首尾八十五岁，幽冥定命，不差毫发，异哉！然则古往今来，蒙高爵厚禄，巍巍如山者，皆赋于造化，其栖迟厄穷，不怨天尤人可也。铜陵主簿刘注者，于先觉为从弟，说此。（洪迈《夷坚三志·壬》卷五）

### 绍圣四年丁丑科(1097)何昌言榜

傅 默

【传记】傅默，江西新城县沙溪人，绍圣四年丁丑科何昌言榜进士。（见《正德新城县志》卷七；参见《正德建昌府志》卷一五，《同治新城县志》卷八，《同治建昌府志》卷七，《光绪江西通志》卷二一）

王 缙

【传记】王缙，无咎子，纲之弟，江西新城县人，绍圣四年丁丑科何昌言榜进士。官朝奉大夫、儒林郎。（见《正德新城县志》卷七；参见《同治新城县志》卷八，《正德建昌府志》卷一五，《同治建昌府志》卷七，《光绪江西通志》卷二一）

### 元符三年庚辰科(1100)李崱榜

傅 炳

【传记】傅炳，江西新城县沙溪人，元符三年庚辰科李崱榜进士。官奉议郎。（《正德

新城县志》卷七；参见《正德建昌府志》卷一五，《同治新城县志》卷八，《同治建昌府志》卷七，《光绪江西通志》卷二一）

### 余邦光

**【传记】**余邦光，字希善，江西新城县宏村人，元符三年庚辰科李崱榜进士。官知澧州军。（见《同治新城县志》卷八；参见《同治建昌府志》卷七）

## 大观三年己丑科(1109)贾安宅榜

### 过卓

**【传记】**过卓，字以立，江西新城县西乡人，大观三年己丑科贾安宅榜进士。官常山令。因蔡京、童贯专政，归隐不仕。（见《同治新城县志》卷八；参见《正德建昌府志》卷一五，《同治建昌府志》卷七，《光绪江西通志》卷二一）

## 绍兴二年壬子科(1132)张九成榜

### 傅霖

**【传记】**傅霖，江西新城县沙溪人，绍兴二年壬子科张九成榜进士。官清海军节干。（见《正德新城县志》卷七；参见《正德建昌府志》卷一五，《同治新城县志》卷八，《同治建昌府志》卷七，《光绪江西通志》卷二一）

## 绍兴八年戊午科(1138)黄公度榜

### 刘懋

**【传记】**刘懋，扶庆之孙，江西新城县人，绍兴八年戊午科黄公度榜进士。官工部员外。（见《正德新城县志》卷七；参见《同治新城县志》卷八，《同治建昌府志》卷七，《光绪江西通志》卷二二）

## 绍兴十五年乙丑科(1145)刘章榜

### 余去病

**【传记】**余去病，字世则，江西新城县宏村人，绍兴十五年乙丑科刘章榜进士。官朝奉郎，因上疏劾秦桧，出判衢州。（见《同治新城县志》卷八；参见《正德建昌府志》卷一五，《同治建昌府志》卷七，《光绪江西通志》卷二二）

王垂仲共，南城人。绍兴乙丑赴省试，闻术士史言方有声，往谒之。史问知乡里，曰：“旦者仙郡李鼎、周楠、余去病、石仲堪四先辈来问命，言独不取石君，余言当高过。”又询所业经，曰：“习《易》。”史曰：“适南剑邓晦先辈亦云治《易》，此人今年当擢第。”语罢，始推王五行，曰：“毋讳吾说，君非但今兹不利，后举亦不得乡荐，岁在庚午当再举，辛未必成就也。”王不乐而退。已而六人得失皆验，所谈王后来事，的的不差。既廷对，又与同年乡人江秉钧往谒，史已不忆前事，独云：“二君复何问？岂非欲知高下耶？然科级皆不高，王君



尚可居黄甲。更有一说，江君生乙巳，带格角杀，必过房义养者。”二人相顾叹异。盖江本甘氏子，来为江翁后云。暨唱名，王第四甲，江末等。史生之精妙如此。右一事皆王仲共说。（洪迈《夷坚丁志》卷一九《史言命术》）

### 刘虢瑞

【传记】刘虢瑞，江西新城县人，绍兴十五年乙丑科刘章榜进士。（见《同治新城县志》卷八）

刘虢瑞，字光祖，北坊人。大理寺丞扶之曾孙。举绍兴进士，历官起居注、翰林侍读、翰林待制。问学优赡，辞致高雅；秉礼陈制，风义凛然。升刑部侍郎。莅政明慎，时论重之。进龙图阁学士，封彭城郡侯。（《同治新城县志》卷一〇；参见《正德新城县志》卷七、八，《正德建昌府志》卷一五、卷一六，《明一统志》卷五三，《同治建昌府志》卷七、卷八，《光绪江西通志》卷二二、卷一五五）

### 刘尧臣

【传记】刘尧臣，江西新城县北坊人，绍兴十五年乙丑科刘章榜进士。官筠州刺史。（见《同治新城县志》卷八；参见《正德建昌府志》卷一五，《正德新城县志》卷七，《同治建昌府志》卷七，《光绪江西通志》卷二二）

## 绍兴十八年戊辰科(1166)王佐榜

### 刘希旦

【传记】刘希旦，字德卿，尧臣侄，江西新城县北坊人，绍兴十八年戊辰科王佐榜进士。官朝奉郎、通判辰州，河北道都转运使。（见《同治新城县志》卷八；参见《正德新城县志》卷七，《绍兴十八年同年小录》，《正德建昌府志》卷一五，《同治建昌府志》卷七，《光绪江西通志》卷二二）

### 李万祥

【传记】李万祥，江西新城县南坊人，绍兴十八年戊辰科王佐榜进士。官兵部职方员外，升郎中。（见《同治新城县志》卷八；参见《同治建昌府志》卷七）

### 危定国

【传记】危定国，祐之曾孙，江西新城人，绍兴十八年戊辰科王佐榜进士。（见《同治新城县志》卷八；参见《正德新城县志》卷七，《同治建昌府志》卷七，《光绪江西通志》卷二二）

### 陈孔休

【传记】陈孔休，孔明弟，江西新城县人，绍兴十八年戊辰科王佐榜进士。（见《同治新城县志》卷八；参见《正德建昌府志》卷一五，《同治建昌府志》卷七，《光绪江西通志》卷二二）

### 黎献民

【传记】黎献民，江西新城县东坊人，绍兴十八年戊辰科王佐榜进士。（见《同治新城